

# LA QUOTIDIANA

FMR Fundaziun Medias Rumantschas, Via da Mesans 2, 7000 Cuira, 081 544 89 11, redacziun@fmr.ch




CARICATURA MAD

## Raquintar dil svilup – cun satira

Il 13 da fevrer 2022 eis ei exact 100 onns che Hans Moser ei naschius a Schaffusa. «Hans Moser, tgi ei quei»? La caricatura cheu sura tradescha empau dapli. Ils da Laax enconuschan en quella il clutger da lur baselgia parochiala. La fundaziun Pro Laax ha dedicau ina retscha d'occurrenz a lur convischin Hans Moser ch'ei morts igl october 2012. 1963 era el secasaus a Laax cun sia famiglia. Leu ha el observau il svilup turistic e commentau quel cun sias caricaturas. (fmr/abc)

[pagina 4](#)



Sportists sil podest, illustraziuns inspirontas e divertentas.

FOTO MAD

## Il «pessimist cuntent» cumpleness 100 onns

Unn avon diesch onns ei il caricaturist da renum Hans Moser mort. Dapi 1963 viveva quel cun sia famiglia a Laax. En siu atelier el quartier Caplania ha el schaffiu cun pluma gita nundumbreivels dessegns. Ils 13 da fevrer 2022 cumpleness el 100 onns, la fundaziun Pro Laax dedichescha ad el in program variont.

AUGUSTIN BEELI/FMR

1972 ein ils giugs olimpics d'unviern stai a Sapporo. Per la Svizra eis ei stau in'Olimpiada numentaliva. *Bernhard Russi* ei vegnius campion ella cuorsa rapida. La delegaziun svizra dumbrava 46 atlets e sis atletas, ella ei turnada a casa cun 10 medaglias. Suenten l'Uniun sovietica e la DDR ei quei stau il tierz plaz ella rangaziun dallas naziuns. Ils «gis dad aur da Sapporo» han anflau in grond plaz ella historia dil sport svizzer. Quei ei stau avon gleiti 50 onns, dils 3 tochen ils 13 da fevrer 1972.

### In program giubilar pigl indigen

Exact il gi che quell'olimpiada d'unviern ei ida a fin ha Hans Moser cumplenui siu 50avel gi da naschientscha. Co e nua ch'el ha passentau quei gi ei buca enconuscent. Forsa sa la fundaziun Pro Laax eruir gliez duront gl'onn commemorativ «100 onns Hans Moser». El ha designau per la revista satirica Nebelspalter, per la Weltwoche, schizun per l'americana Herald Tribune, mo era per la gasetta locala Arena Alva. Ina da sias figuras ch'ins enconuscheva generalmein en Svizra era il «Herr Schüüch». Il president dalla Pro Laax, *Erwin Ardüsler*, conferma ch'in comite ha priu l'iniziativa e dedicau in program annual al giubilar. «Dil comite fan part representants dalla vischnaunca, da nossa fundaziun, dil Museum, dalla Cularta sco era d'amitgas ed amitgs da Hans Moser», gi el.

Hans Moser e sia dunna Sonja vivevan buca mo a Laax, els predevan era part stediamein dalla veta dil vitg e valevan sco vers indigen. Las duas feglas ein idas a scola a Laax e tschintschavan era romontsch. Il caricaturist e sia dunna Sonja, oriunda dal Danemarc, entupavan ins regularmein a radunonzas da vischnaunca e d'uniuns, vernissaschas e sentupadas dalla cuminonza dil vitg.

### Senza vuler permalar

Ei fa buca surstar che Hans Moser ha surdau alla fundaziun Pro Laax siu relasch personal. «Ussa ei il mument arrivau per sefatschentar in detagl da quei, sistematisar gl'inventari ed empurar da cumplettar quei archiv cun tut quei ch'el ha fatg el decuors da sia liunga veta», tradescha *Erwin Ardüsler*. Nundumbreivlas caricaturas humoristicas ha el fatg per il Nebelspalter e tozzels auters stampats. «Ei dian ch'jeu seigi in pessimist cuntent», ha el getg avon 20 onns al redactor dalla LQ a caschun d'ina viseta per ses 80 onns. Sias caricaturas ein tipicas e portan siu agen stil: Fin, sec, sarcastic-ironic, divertent. Senza vuler permalar mava el cul det ella plaga gest en «siu» vitg da Laax. El rendeva attent cun in dessegna a pistas senza neiv, el commentava ils canuns da neiv. Temas preferi eran ils quitaus pigl ambient e las consequenzas dil turissem da massa.




Ina caricatura che carmala in surrir. Tipic Moser.

FOTO MAD

### Il sport, tema engrazieivel

Hans Moser, il caricaturist da renum internaziunal, ei naschius ils 13 da fevrer 1922 a Neuhausen el cantun Schaffusa. Sia mamma Laura Roussette era carschida si en Val Müstair e tschintschava romontsch. Hans Moser deplorava meinsvert ch'el haveva mai empriu da discuerer romontsch. Siu lungatg-mumma era gl'engles, el ei era burghais american e discurreva tudestg cun in accent american. Vitier discurreva el era franzos, italian e danes. Ils geniturs Hans e Laura Moser-Roussette, il buobet Hans da sis onns e la sora, eran emigrai 1928 els Stadis Uni. A Brooklyn/New York eis el carschius si. Ina tresta sort ha spitgau la famiglia, pertgei la mamma ei morta 1932 da cancer ed il bab haveva piars la lavur tras il crash alla buorsa gl'onn 1929.

A Laax ha Hans Moser anflau gl'igniv che ha muncau ad el ell'America. En siu atelier ha el luvrau sco caricaturist, columnist ed autur. Sia figura pli locala era il «Closchi» che cumpareva mintg'jamna ella gasetta jamnila Arena Alva. In dils cudischs ch'ei cumpariu gl'atun 1972 ella



Hans Moser 1922-2012.

MAD

casa editura Nebelspalter ha il tetel «Mitlachen ist wichtiger als siegen». Sepp Renggli ha scret la prefaziun. Hans Moser capeschi il sport sco enzatgei legher, e sco ina cuntinuaziun dil regl da far termagls dils affons pigns. Sport seigi giug e giug seigi rir, ha gl'enconuscent reporter da sport manegiau. Igl onn 1972 dils pli gronds success a Sapporo ha inspirau specialmein il caricaturist da Laax. Il cudisch cuntegn 90 paginas pleinas cun figuras en moviment, cun skis, curling, hockey, sil podest, el gol, ell'aua, ella cabina ed el stadiun.

### Purtei «Vies» Moser

Igl anniversari da 100 onns Hans Moser croda silla dumengia dils 13 da fevrer 2022. Igl ei buca mo il gi da votaziun, mobein era in termin amiez ils 24avel giug olimpics a Beijing. Quei gi organischescha la fundaziun Pro Laax l'acziun «Purtei 'Vies' Moser». El decuors da sia veta ha quel fatg biaras lavurs sin giavisch. Leghers dessegns e caricaturas per occurrenzas da tut gener che pendan usa en stivas privatas. Quellas lavurs vul la Pro Laax documentar e nudar egl inventari dil relasch. Quella dumengia installescha ella per quei intent in studio ella Sentupada a Laax. Igl ei la sala sper la casa pervenda. Dalls 13.00 tochen las 16.00 san visitaders purtar leu lur ovras e caricaturas personalas fatgas da Hans Moser. Quellas vegnan fotografadas e documentadas ensem cun possessurs. Silsunter vegnan las fotos piazzadas silla pagina d'internet dalla fundaziun Pro Laax, ella Cularta, el Museum e sillas plattafuormas creadas aposta pigl onn giubilar.

Per saver planisar ils termins eis ei necessari da s'annunziar tier [info@cularta.ch](mailto:info@cularta.ch), ni 078 635 96 65. Dapli informaziuns mira [www.prolaax.ch/100](http://www.prolaax.ch/100)

## GIMNASI MUSTÉR



La maturanda Mia Bandli ed in jak dil menaschi puril dalla famiglia en Stussavgia.

FOTO MAD

## Interessantas conclusiuns davart ils jaks

El rom da sia lavur da matura al gimnasi a Mustér ei Mia Bandli da Stussavgia-Plaz sefatschentada dils jaks. Concretamein ha ella vuliu saver dapli dalla producziun da carn da quels animals. Ella ei vegnida ad interessantas conclusiuns.

HANS HUONDER/FMR

«Cura ch'jeu sundel semessa alla tscherca d'in tema per mia lavur da matura hai jeu spert fatg persenn che bia ei memia extendiu per ina lavur da matura e bia memia car», di Mia Bandli. Aschia ha ella stuiu entscheiver danovamein cun sias ponderaziuns e spert eis ei era stau clar ch'ella vegli scriver ina lavur en in connex cun animals. Mo tgei animals?

### Priu en mira ils jaks

Da sia mumma seigi ella vegnida fatga attenta ch'ei detti en Svizra neginas datas davart il recav da carn dils jaks. Da vart la supprastonza dall'Uniun svizra dalla tratga da jaks beneventassien ins talas datas. «Aschia sun jeu sedecidida da sefatschentar da quell'idea en connex cun mia lavur da matura», di la maturanda da Stussavgia. Il medem mument ha ella denton era vuliu saver dapli dils facturs da pavel e tratga cun effect silla carn. Mia Bandli ha allura intercuretg il recav dalla carn dils jaks en Svizra e persuerter ha ella saviu sevolter tier in tschuppel menaschis. Quels han informau ella ad aschia possibilitau la lavur da matura. Sia famiglia a Stussavgia tegn senza jaks: «Quei ei il cass dapi biars onns, il mument havein nus 25 tocs.» Jaks seigien buca ils sulets animals empau specials sil menaschi puril: «Nus havein denter auter era dus camels e lamas.» Ina vacca-jak ha ina peisa viva denter 200 e 300 kg.

### In animal dil Himalaya

Jaks derivan oriundamein dallas muntognas dil Himalaya. Els vivan leu sin in'altezia da 3000 entochen 5000 meters sur mar e quei duront igl entir onn ora. «La Svizra ei la suleta tiara europea che meina in cudisch da tratga da quels animals», constatescha Mia Bandli. En sias retschercas ei semussau ch'igl ei pusseivel da recaltgar d'in jak ella media 57,68 pertschien carn da sia peisa da maz. La peisa da maz ein las duas parts digl animal, pia senza pial, dadens e tgau. Tiels animals masculins ei la cumpart empau pli aulta che tiels animals feminins. Per contonscher ina buna raccolta da carn duessen jaks vegnir perversi cun bia fein, risdiv ed ina pintga part strom. Silascha ha in effect negativ. Jaks duessen vegnir teni il bia dil temps ordaviert sin pastiras e mo in cuort temps en nuegl. Era quels facturs hagien in effect silla carn. «La stad duessen jaks passentar si d'alp», scriva Mia Bandli ella resumaziun da sia lavur da matura. La quintessenza da sia lavur: «La pli biara carn furneschan animals che han ina vivonda se-meglianta sco en lur tiara oriunda – il Himalaya.»

La FMR presenta ina schelta da lavurs da matura dil gimnasi dalla claustra da Mustér. Quellas ein vegnidas presentadas dacuort ed ein ina part dils examens finals dallas maturandas e dils maturands.

## GLION

### Purschida da «walk-in»

Il Spital regional Surselva a Glion porscha in'ulteriura caschun da seschar vaccinar senza preannunzia encunter il coronavirus. Quei ei pusseivel venderdis, ils 4 da fevrer 2022 el rom d'ina purschida da «walk-in» dallas 16.00 tochen las 19.00 el center da vaccinaziun dil spital. Per tuttas persunas interessadas cun ina vegliadetgna naven da 12 onns stattan a disposiziun ils vaccins da Pfizer/Biontech e da Moderna. La vaccinaziun da rinfrestgament vegn cussegljada da far sil pli baul quater meins suenter l'immunisaziun da basa. Sco quei ch'il Spital regional scriva en ina comunicaziun als mieds da massa, duei quella succeder sche pusseivel cul medem vaccin. (cdm/fmr)